

25. april 2005

UPA 2005/17

**Pisortanut akiitsut akilersinniarneqartarnerat pinaveersaartinneqarnissaallu
pillugit Inatsisartut inatsisaata allanngortinneqarneranik Inatsisartut
inatsisissaattut siunnersuut**

pillugu

Inatsisartut Akileraartarnermut Akitsuusiisarnermullu Ataatsimiititaliaata

ISUMALIUTISSIISSUTAA

Siunnersuutip aappassaaneernejarnerani saqqummiunneqartoq

Inatsisartut Akileraartarnermut Akitsuusiisarnermullu Ataatsimiititaliaat
suliarinninnermini ukuninnga inuttaqarpoq:

Inatsisartunut ilaasortaq Jurgen Weyer Johansen, Siumut, siulittaasoq
Inatsisartunut ilaasortaq Agathe Fontain, Inuit Ataqtigiit, siulittaasup tullia
Inatsisartunut ilaasortaq Simon Olsen, Siumut
Inatsisartunut ilaasortaq Augusta Salling, Atassut
Inatsisartunut ilaasortaq Per Skaaning, Demokraatit

UPA 2005-imi siullermeerinerup kingorna siunnersuut matumani pineqartoq
Inatsisartut Akileraartarnermut Akitsuusiisarnermullu Ataatsimiititaliaata suliaraa.

Siunnersuutip imarisai

Pisortanut akiitsut akilersinniarneqartarnerat pinaveersaartinneqarnissaallu pillugit
Inatsisartut inatsisaanni aalajangersakkat aqutigalugit atuagaateqarfiit
akiliisitsissutaannik akilinngitsuukkanik akiliisitsiniarsinnaaneq siunnersuut manna
aqutigalugu tunngavissinneqarpoq. Atuagaateqarfiit atortuutaannik kingusinaarluni
tunniussisoqarsimappat aseruisoqarsimappalluunniit atuagaateqarfinni atortartut
atuagaateqarfiit akiliisitsissutaannik nalinginnaasumik akileeqquneqartassapput.

Siunnersuutip akuersissutigineqarneratigut eqqartuussivimmi eqqartuussummik piniaqqaanngikkaluarluni pisassarisat siuliani allassimasutut ittut Kalaallit Nunaanni eqqartuussisarneq pillugu inatsimmi nr. 271-imi, 14. juni 1951-imeersumi kapitali 7-mi malittarisassat malillugit pinngitsaaliissummik akiliisitsissutiginiaqqullugit atuagaateqarfiit kommunini akiliisitsiniartartut qinnuigisinnaanngussavaat. Ilaatigut pisortanit ikiorsiissutit pillugit Inatsisartut peqqussutaat naapertorlugu pisassarilersimasat ullumikkut taama akilertinniarneqartareerput.

Naalakkersuisut naliliinerat malillugu akiligassanit kinguaattoorutit ukiumut 30.000 kr.-it tikillugit amerlassuseqartut akiliisitsiniartarnikkut isertitsissutigineqartarnissaat naatsorsuutigineqarpoq.

Siunnersuut UPA 2005/23-imut, tassalu Atuakkanik atorniartarfeqarneq pillugu Inatsisartut peqqussutaata allanngortinneqarneranik Inatsisartut peqqussutissaattut siunnersuummut attuumassuteqarpoq.

Tusarniaanermi akissutisiat

Siunnersuut matumani pineqarpoq tusarniaanermut akissuteqarnissamut 13. december 2004 killiliullugu KANUKOKA-mut, Aningaasaqarnermut Pisortaqaarfimmumut, Naalakkersuisut Allattoqarfiannut aammalu Kultureqarnermut, Ilinniartitaanermut, Ilisimatusarnermut Ilageeqarnermullu Pisortaqaarfimmumut ulloq 9. november 2004-mi tusarniaassutigalugu nassiunneqarpoq. Tusarniaaffigineqartussaataitaasut siunnersuummik naliliinissaannut naammaginartumik piffissalernerqarsimasut Akileraartarnermut Akitsuusiisarnermullu Ataatsimiititaliap iluarisimaarlugu maluginiarpa.

Tusarniaanermi akissutigineqartut ilusiliinermut annertunerpaamik attuumassuteqartut aammalu tusarniaaffigineqartut oqaaseqaataat naammaginartumik annertussusilimmik ilanngunneqarsimasut ataatsimiititaliap paasivaa. Tamatuma saniatigut tusarniaanermi akissutisiat ataatsimiititaliap oqaaseqaateqarnissaanut pissutissaqalersitsinngillat.

Akileraartarnermut Akitsuusiisarnermullu Ataatsimiititaliap inassuteqaataa

Siunnersuut saqqummiutissallugu pissutissaqarluartoq Akileraartarnermut Akitsuusiisarnermullu Ataatsimiititaliap isumaqatigiittoq isumaqarpoq matumuunala inassutigissallugu siunnersuut saqqummiunneqarnermisut iluseqarluni Inatsisartunit akuersissutigineqassasoq.

Jürgen Weyer Johansen,
Siulittaasoq

Agathe Fontain

Simon Olsen

Augusta Salling

Per Skaaning